



Radiotelevision
Svizra Rumantscha

Commentari

Culp da teater

Gian Ramming, schefredactor RTR

Radio rumantsch

Magdalena Martullo-Blocher candidescha per PPS GR

20-04-2015

Prima vista ha la PPS procurà oz per ina buna situaziun da partenza per las elecziuns dals 18 d'october. Cun la nominaziun da Magdalena Martullo-Blocher è gartegià a la PPS in veritabel culp da teater che ha procurà per in'attenziun mediala che surpassa ils cunfins dal Grischun.

Lura vegn la candidatura era ad avair manà ad ina tscherta inquietezza tar las autras partidas burgaisas. Quai perquai che Martullo-Blocher dispona da cumpetenzas che las partidas dal center pretendan normalmain d'avair.

Ella dispona senza dubi d'ina gronda cumpetenzza ed experientscha economica. Sco scheffa da las Ovas da Domat dat ella lavur a bundant 1000 personas e segirescha uschia l'existenza d'in sumegliant dumber da famiglias. Ultra da quai è ella la garanta par excellence d'ina politica anti-europeica. Ina politica che ha era success en il Grischun. E – last but not least – dat la candidatura da Martullo- Blocher la pussaivladad a tut quels che han anc adina il basegna da far giu quint cun il PBD e cun sia cussegliera federala Eveline Widmer Schlumpf e da sa revantschar uschia per la nun-reelecziun da Christoph Blocher.

Però: Basta quai per vegnir elegida? Impussibel da dir oz. I dat numnadamain era buns arguments encunter Martullo-Blocher. Enfin oz n'han ins betg udì bler ch'ella saja s'engaschada politicamain per il bainesser da l'entir Grischun. Betg en dumondas dal turissem, betg en dumondas da politica d'energia e betg en dumondas che pertutgan il svilup da regions periferas. Da quel deficit sto ella l'emprim anc vegnir libra.

Ultra da quai: co cumprova ella ch'ella cumbatta – cura ch'i va dir sin dir – per ils interess dal Grischun e betg mo per quels da las Ovas da Domat?

Restan anc ils pregiudizis grischuns encunter quels da Turitg. I n'è betg evident che Grischunas e Grischuns vulan propi vegnir represchentads a Berna d'ina Turitgaisa.

Curt: l'unic ch'è passablamain segir oz: il cumbat electoral ha survegnì "svung".